

**Siunnersuut uunga: Inatsisartunut Naalakkersuisunullu il.il. ilaasortat  
aningaasarsiaqartitaanerat il.il. pillugit Inatsisartut inatsisaata  
allanngortinneqarneranik Inatsisartut inatsisaat nr. xx, uu. qqqq 2011-meersoq.**

**pillugu**

**Suleriaatsimut Ataatsimiititaliap**

**ISUMALIUTISSIISUTAA**

**siunnersuutip aappassaaneerreqarneranut saqqummiunneqartoq**

Ataatsimiititaliap suliarinninnermini ilaasortarai:

Inatsisartut Siulittaasuut Josef Motzfeldt, IA, siulittaasoq  
Inatsisartunut ilaasortaq Per Berthelsen, Siumut, siulittaasup tullia  
Inatsisartunut ilaasortaq Olga P. Berthelsen, IA  
Inatsisartunut ilaasortaq Finn Karlsen, Siumut  
Inatsisartunut ilaasortaq Justus Hansen, Demokraatit  
Inatsisartunut ilaasortaq Siverth K. Heilmann, Atassut  
Inatsisartunut ilaasortaq Knud Fleischer, Kattusseqatigiit Partiaat

Ataatsimiititaliap UKA2010-mi 12. november 2010 siullermeerinnittoqareermat siunnersuut misissuataarpaa.

**Siunnersuutip imarisaa siunertaalu**

Siunnersuutip saqqummiunneqartup ilaatigut malitsigissavaa Inatsisartut Siulittaasuata aamma Naalakkersuisut Siulittaasuata kiisalu Naalakkersuisunut ilaasortat ineqarnermut akiliutigisartagaasa ullutsinnut naleqqussarneqarnerat. Ineqarnermut akiliutaasarsimasut ukiorpassuarni iluarsineqarsimanngillat, siulittaasut eqqarsaatigalugit akeqanngitsumik ineqartinneqarnerup akileraartarnermut oqartussanit aalajangersarneqartumik akileraartarnikkut naleqartitsinikkut Naalakkersuisunullu ilaasortat eqqarsaatigalugit sulinermit atatillugu inissiamut ineqarnermut akiliutip isumaqatigiinniutigineqarsimannginneratigut.

Inatsisissatut siunnersuutip siunertaraa iluarsisarsimannginnerit tamakku ullutsinni ineqarnermut akiliutaasartunut iluarsissallugit, peqatigitilluguli aamma isiginiarlugu Naalakkersuisut Siulittaasuattut aamma Inatsisartut Siulittaasuattut kiisalu Naalakkersuisunut ilaasortatut

atuuffiit artukkerneqannginnissaat taamatut annertuumik akisussaaffeqarnermut naapertuutinngitsumik ineqarnermut akiliutip annertussusilerneqarneratigut.

Inissiat qinikkanut pineqartunut atugassiissutigineqartut taamatut atuukkunnaarnermi qimanneqartussaapput, tamatumunngalu atatillugu namminersorlutik oqartussat nuunnermut atatilugu aningaasartuutit akilertussaallugit iserternermut pissutaasut pissutigalugit. Tamatumani minnerunngitsumik eqqarsaatigineqarput atuuffiup assigiinngitsunik pissuteqartumik maanaannakkut kipitinneqarsinnaanera, soorlu nutaamik qinersisoqarneratigut, naalakkersuinikkut pissutsit il.il. pissutigalugit.

Inatsisartunut ilaasortat ullumikkut qanigisat perulunnerannut toqunerannullu atatillugu sulingiffeqarsinnaatitaapput, soorlu aamma naartunermi, erninermi meeravissiartaarnermilu sulingiffeqartoqarsinnaasoq. Pisinnaatitaaffiit taakku inatsisissatut siunnersuutikkut siunnersuutigineqarput aamma Naalakkersuisunut ilaasortanut atuutsinneqalissasut.

Pisuni qaqutigoortuni paasinarsisimavoq isumalioqatigiissitanut, ataatsimiititalianut il.il. immikkut ilisimasallit malittarisassat atuuttut malillugit aningaasarsiaqartitsineq naammanngitsoq, taamaattumillu maanna siunnersuutikkut inatsisitigut tunngavissiisoqarniarluni Inatsisartunut ilaasortaangitsut isumalioqatigiissitanut ataatsimiititalianullu il.il. ilaasortat immikkut aningaasarsiaqartinneqarsinnaanerannik aalajangersaasinnaanissamut.

Kiisalu peqatigitillugu inatsisip danskisut oqaasertai kalaallisut taaguutininut atuuttunut iluarsineqarput.

### **Inatsisartut siunnersuummik siullermeerinninnerat**

Ataatsimiititaliamut ilaasortat iluarisimaarlugu paasivaat siunnersuutip siullermeerneqarnerani partiit tamarmik nalorninertaqanngitsumik siunnersuut taamatut isikkoqartillugu ataatsimut isigalugu tapersersinnaammassuk.

Taamaakkaluartoq siunnersuutip ataatsimiititaliamut innersuunneqarnissaa pisariaqartutut isigineqarsimavoq Inatsisartuni partiit marluk eqqarsarnartoqartitsimmata, siunnersuutip suku-miinerusumik oqallisigineqarnissaanik pisariaqartitsilersumik.

Siumut isumaqarpoq naalakkersuisunut ilaasortat Nuup avataaneersut naalakkersuisunngornerminni najukkaminni inigisaminnik attassiinnartut, taamalu marloqiusamik ineqarnermut akiliuteqartalerlutik, inissiani piumasarineqartuni pisussaaffilerneqarnermikkut aningaasatigut annertuumik artukkerneqarsinnaasut, taamaattumillu ineqarnermut akiliutip annertussusia nalilersorneqartariaqarluni.

Taamatuttaaq ineqarnermut tunngatillugu Demokraatit kissaatigaat maanna nunatta karsiata tatisimaneqarnerani Naalakkersuisut salliusariaqartut tamakkiisumillu ineqarnermut akiliu-

teqartarlutik, taamatullu aamma Naalakkersuisut sapinngisamik namminerisaminnik ineqarta-  
riaqaraluartut.

Partiip ilanngullugu siunnersuutigaa, piffissaq sivilisnerpaamik ilaasortaajunnaarnersiuteqarfi-  
usinnaasoq qaammatinut arfinilinnut affaannanngortinneqassasoq.

Taamaakkaluartorli uparuaanerit taaneqartut siunnersutip Inatsisartuni partiinit tamanit taper-  
sersorneqarneranik allanngortitsinngillat.

### **Tusarniaanermi akissutit**

Inatsisissatut siunnersut Naalakkersuisut Siulittaasuata Naalakkersuisoqarfiata Inatsisartullu  
Allattoqarfiata ataatsimut suliaraat, taamaallaallu Inatsisartunut Naalakkersuisunullu ilaasortat  
taamatut atuuffeqarnerminni najoqqutassaannut tunngalluni. Saqqummiunneqannginnermini  
tusarniaatigineqarsimanngilaq, Inatsisartut Siulittaasoqarfiata ilusissanut piumasaqaasiaanut  
naapertuuttumik.

Taamaattorli suleriaatsimut ataatsimiititaliap siullermeerinninnermi oqaaserineqartut tunn-  
gavigalugit naalakkersuinikkut suliniaqatigiiffiit kaammattorsimavaat tusarniaanermi akissu-  
teqaqqullugit.

Partii Demokraatit kisimik akissuteqarput ima akissuteqaramik” *Demokraatit siunnersutigaat  
Naalakkersuisunut ilaasortat ineqarnermut akiliutaat akiliutip 70 %-ianut qaffanneqassasut.*”

Ataatsimiititaliap iluarisimaarlugu paasivaa tusarniaanermi akissuteqarnikkut tassuuna inatsi-  
sissatut siunnersuut siullermeerinninnermilu partiit allat isumaat annertuumik naaperiarneqar-  
mata.

### **Ataatsimiititaliap siunnersuummik suliarinninnera**

Taamatut atuunnermut atatillugu Naalakkersuisunut inissaqartinneqarnikkut atugassarititaasut  
ataatsimiititaliap isumaliutersuuteqarfigisimavai.

Tamatumani isiginiarneqarsimavoq ilaasortat Nuup avataaneersut marloqiusamik ineqarner-  
mut akiliuteqartarnermikkut immikkut aningaasartuutigisartagaat, aamma ilaasortanut Nuum-  
mi najugaqareersunut atuussinnaasarmata. Tamatumani ilaatigut assersuutissaqareerpoq, pi-  
neqartut namminnerisaminnik inissiamik pisisimallutik, peqatigitilluguli aamma Naalakkersu-  
isunut ilaasortat Nuummi najugallit inissiamut sinniisutut pisussaaffinnik naammassinninnis-  
samut inissalimmut anginerusumut nuunnissaminnik kissaateqartarsimallutik. Naallu aamma  
taakku ilaasortallu Nuup avataaneersut angerlarsimaffimmini inissiaqareersut inissiap attor-  
tinnissaa iluatsikkaluarpalluunniit, ajornaatsuinnaanngilaq nalorninartortaqaartaqalunilu taama-  
tut pigisap aalaakkaasup attartortinneqarnera, naak marloqiusamik ineqarnermut akiliutaas-  
artut tamatumuuna annikillisinneqarsinnaagaluartut.

Taamatut pisartut eqqarsaatigalugit ataatsimiititaliap kissaatigaa erseqqissassallugu Naalakkersuisunut ilaasortaq kinaluunniit nammineq piumasani akimorlugu pisussaatinneqarsinnaangimmat inissiamut sinniisutut pisussaaffinnik naammassinninnissamut inissalimmut nuunnissaminut.

Ataatsimiititaliap taamatutaaq inissiat atuuffik tunngavigalugu innersuunneqartut tamakkiisumik akilerneqartalernissaannit kissaat isummerfigaa. Ataatsimiititaliaq isumaqarpoq tamanna oqallisigineqarsinnaangitsoq marloqiusamik ineqarnermut akiliuteqartarsinnaanerup ajortumik kingunerisinnaasai tamatumunnga ilanngunnagit, taamaattumillu aamma tamanna aalajangiiniarnermi ilanngullugu isiginiarneqartariaqarluni.

Ataatsimiititaliap siunnersuummik oqallisiginninnermi nuannaarutigalugu paasivaa apeqqummut tamarmut ataatsimut isummertoqarsinnaasimammat ineqarnermut akiliutissap qaqugukuulluunniit naatsorsorneqartup 60 %-ianik ineqarnermut akiliuteqartarnissamik siunnersuut saqqummiunneqartoq ilalerlugu.

Piffissap ilaasortaajunnaarnersiuteqarfiusup sivikillineqarsinnaanera ataatsimiititaliap oqallisaattaq. Taamatut appartitsinissamut allanik periarfissaqarnera ataatsimiititaliap takusinnaangilaa, taamaattumillu ataatsimiititaliap siunnersuutigalugu piffissaq ullumikkut ilaasortaajunnaarnersiuteqarfiusartoq inatsisiliornerni atuuttuni aalajangersarneqarsimanermisut aalajangi-usimaneqassasoq.

Suleriaatsimut Ataatsimiititaliap inatsisissatut siunnersuummik suliarinninnermini tjenestemandinut Namminersorlutik Oqartussani kommuninilu atorfilinnut inatsisiliornernit atuuttut qissimillattaarsimavai, tamatumunngalu ilanngullugu nalilerlugu qanigisat toqunerinut napparsimarulunnerinulluunniit atatillugu siunnersuutikkut Naalakkersuisunut ilaasortat, tjenestemandinut Inatsisartunullu ilaasortanut atuutereersutut, aamma sulinngiffeqarsinnaatitaalernerat aamma kinguneqartariaqannginnersoq Inatsisartunut Naalakkersuisunullu ilaasortat tjenestemandit assigalugit qanigisat napparsimarulunnerinut toqunerannullu atatillugu aamma akiliunneqarlutik angalasinnaatitaalernerannik.

Ataatsimiititaliap taamatut akiliunneqarluni angalasinnaatitaalernissap eqqunneqarnissaa siunnersuutigissallugu pissusissamisoortutut isigisimavaa. Ataatsimiititaliaq isumaqarpoq taamatut akiliunneqarluni angalasinnaatitaalernermik atuinissamik pisariaqartitsilerneq qaqutigunaq pisassasoq, taamatulu aningaasartuutaavallarnaviarani. Allanguutissatut siunnersuummut aningaasartuutit taamaalillutik Inatsisartunut Naalakkersuisunullu aningaasaliissutaareersunit matussuserneqarsinnaassapput. Siunnersuut taamaalilluni aamma allaffissornikkut artukiinaviangilaq, malittarisassallu tjenestemandinut atuutereersut malillugit ingerlanneqartussaassalluni.

Tamanna tunngavigalugu ataatsimiititaliaq akiliunneqarluni angalasinnaatitaaneq pillugu allanngutissatut siunnersuuteqarniarpoq.

Inatsisissatut siunnersuutip atuutilerfissaata 1. juni 2011-mut aalajangersarneqarnissaa siunnersuutigineqarpoq.

**Suleriaatsimut Ataatsimiititaliap inassutigaa**

Ataatsimiititaliap isumaqatigiittup tamanna tunngavigalugu **allannguutissatut siunnersuut ilanngussatut ilanngunneqartoq saqqummiuppaa.**

Taamatut oqaaseqarluni isumaliutissiisummilu nalunaarneqartutut paasinnilluni ataatsimiititaliap siunnersuut taamaalilluni aappasaaniigassanngortippaa.

Josef Motzfeldt, Siulittaasoq

Per Berthelsen

Olga P. Berthelsen

Finn Karlsen

Justus Hansen

---

Siverth K. Heilmann

---

Knud Fleischer